

四庫全書

集部

欽定四庫全書

集部

清容居士集卷

九
七
至

詳校官庶吉士臣張溥

侍讀臣孫球覆勘

總校官降調編修臣倉聖脉

校對官編修_多臣勵守謙

謄錄監生臣邵敬修

欽定四庫全書

清容居士集卷七

元 袁桷 撰

古詩 七言

煮茶圖 并序

者茶圖一卷髣石窓史處州燕居故事所作也石窓
諱文卿字景賢外高祖忠定王曾孫儀觀清朗超然
綺紈之習聚四方奇石築堂曰山澤居而自號曰石

窗山樵此圖左列圖卷比束如玉筍錦繡間錯旁有
一童出囊琴拂塵以俟命右橫重屏石窗手執烏絲
攬書展翫疑有所構思屏後一几設茶器數十一童
偃背運碾綠塵滿巾一童篝火候湯感脣望鼎口若
懼主人將索者如意塵尾巾壺硯紙皆纖悉整具羽
衣烏巾玉色絢起望之真飛僊人予意永和諸賢放
浪泉石當不過是而其泊然宦意翰墨清灑誠足以
方駕而無愧甲午冬十月其孫公疇出以相示因記

而賦之以發千古之遠想云

石窗山樵晉公子獨鶴蕭蕭煙竹裏月湖一頃碧琉璃
高築虛堂水中沚堂深六月生涼秋萬柄風搖紅旖旎
導南更有山澤居四面晴峰插天倚憶昔玉門豪盛時
甲族丁黃總朱紫曉趨黃閣袖香塵俯首脂韋希雋美
一官遠去長安門德色欣欣對妻子豈如高懷脫榮辱
妙出清言洗紉綺郡符一試不挂意岸幘看雲臥林墅
平生嗜茗茗有癖古井汲泉和石髓風回翠碾落晴花

湯響雲鐺袞珠藥齒寒意冷復三咽萬事無言歸坎止
何人丹青悟天巧落筆毫茫研妙理黃梁初炊夢未古
舊事淒零誰復紀展圖縹渺憶遺蹤玉珮珊珊響秋水

贈張玉田

循王五世孫
來鄞設卜肆

將軍金甲明如日勒馬橋邊清警蹕淮濡徹衛羽書沈
置酒行宮功第一蟬冠熊軾填高門英英玉照稱聞孫
張鉉號納齋
堂名玉照百年文物意未盡玉田公子尤超羣紫簫
吹殘江水立野雉驚塵暗原隰夜攀雪柳踏河冰竟上

燕臺論得失丈夫未遇空遠遊秋風淅瀝銷征裘翩然
騎鶴歸海上一笑相問誇綢繆兩曜奔飛互朝夕璇府
森芒蠹莫測要須畫紙為君聽落筆雌黃期破的壺中
白日常高懸道逢落魄呼醉眠清歌停雲意慘淡倚聲
更度飛龍篇

題子昂浴馬圖

昔者原空雪新積羣馬飢鳴渡江食大梁公子心未平
一匹宛駒萬夫敵圉人初浴意氣增跨轡已晚知無成

雲窗徘徊悄無語掩卷索索猶風生

送倪德進歸番易

書眸的的垂玄珠辯口落落傾冰壺寶刀挂壁指閭闔
扁舟挾浪辭東吳低昂黍禾故流道隱沒桑棗遺宮墟
仰看浮雲勿復語俯視逝水誰為圖天衢晴塵接冠蓋
石室古簡搜盤盂大宜置身並班馬小却論事追唐虞
懸知擔簦要有得永愧折簡終難呼深春無人碧桃靜
落月在屋冥鴻俱歌聲清琅振金石筆意橫逸揺瑣瑀

苦心寧為爨下木
帖首不作轅中駒
牛毛取士固當走
魚目眩世徒爭姝
平原飛埃宿麥盡
長河奔潦柔桑枯
還家勿陳賈生策
閉戶趣著神農書
相思我亦返屠肆
靜念子豈淹田廬

送僧德芬過松江

海門山人捐竹杖
笑指飛濤挾雙槳
雲間鶴唳耳不聞
洞下龍歸夢猶想
我聞諸天亦官府
一息塵寰總調御
黃花滿院人跡稀
霜月離離在前戶

憶陳道士

空巖羽人氣為祖玉立秋空振玄古酒酣高嘯裂行雲
直上釣天聽漢武白雲一去誰遺情掉首不問人間名
當時雙瞳傲餘子猶有翰墨傳孤清紫綸交馳丹闕下
人道山中多僕射黃金蛻骨碧藤深夜半寒光明月價
飛鳧縹眇山鬼靈蕙殺一薦端貴誠欲從桂父乞僊露
虛牝回漱笙竽聲

病馬圖

青絲屈曲長安道卓午歸來廢中老側身仰天思遠遊
口不能言顏色悄奚官却立深有疑侶言非病那能醫
願乘長風迅絕足一息八極歸瑤池

次韻張伯雨梅花島

雲屏油幕低覆垂晴日倒映黃琉璃孤根自有巖壑趣
屈曲緹室情依依巍峩青女來藥珠赤脚獨立層冰渠
燧人當陽朝寶鑑金屑簇漏催銅壺何人胷中藏九島
內火迴環不知曉咄嗟已辦天機深頃刻能成化工少

陰陽在手司帝春坐窗更試明窗塵江湖遠涉汝良苦
門外萬竅笙竽吟

次韻渭川春玉圖二首

至人虛心實其腹手種琅玕如種玉晴雲散墨春思浮
咫尺經營千畝足清標亭亭儼矜絜笑脫斑斕賜膏沐
揚旌植纛神君遊萬籟無聲江水淥此君之志那可量
榮辱相忘在空谷大宜蓬萊之三山小宜武夷之九曲
前如綺園歌紫芝後若夷齊侍孤竹隕麋之墨清且奇

脫落玄黃乃真目幽齋尸居耿相對有客叩門深絕俗
天空日沈碧雲湛細酌寒泉芼秋菊夢迴倚杖森在廷
熒熒雙瞳鬢深綠

瑶林羣仙歌捧腹解帶蘭皋捐佩玉深知五采眩空花
守墨空巖思濯足層冰急雪成九轉重露輕煙方一沐
湘君寶瑟調初絕唯見遙峰蘸寒淥長空旋宮起萬籟
翠袖無言守山谷紛紛落葉漫渭水耿耿殘花守韋曲
論功歲晚端有意深愧羣英不如竹森然壁立聯堵牆

變化淋漓傾衆目高人宴坐不出門一榻常懸謝薳俗
每令此君當上坐末席餘清友松菊回首故園新雨晴
無盡春風吹草綠

忍恕堂

大都
袁氏

汝南堂堂臥雪翁飲寒閉戶稱高風吳相亡何不知止
二石醇醪能脫死吾宗高標兩都史餘子紛紛那足比
人生遇事何強嗔百年歲月籠中身水清之魚釣滿餌
白鶴出林紅鶴忌君家兄弟如聯珠熟視不語疑糝糊

連理之木多慈烏大兒拱立羣雛趨家僮大勝千木奴
冬園芋粟夏芙渠壺有美酒架有書不識喜愠真何如
門前駟馬填華裾

飛鴻軒

新安胡則大

冥冥天機衝紫霄炎州雪嶺窮遊遨鷓鴣一枝掩目避
始信懷土非吾曹勞生貴賤各有適攘臂何人限南北
三足之烏今不停寒暑周迴短長刻

李士弘枯木風竹圖

為王隆陳又新作

狂蛟舞空蒼髯拏雙鐵蒙頂雲交加亭亭霜標不受侮
慘澹天籟扶槎牙西山古淵人莫測一柱承天萬牛力
會須截玉化陂龍拂拭苔光遺劍跡

題茅山道士雪梅障

積金峰頭雲五彩天女行空散珠琲為憐絕壑一枝春
玄墨敷調增蓓蕾因風飄零顏愈真竟日霾藏氣逾倍
油轟紛紛成素旄積鐵離離增練鎧如側杯頰承露
亂若銛刀續剪綵雙龍挾輶擬欲上萬馬飛塵卒難挽

高齋鐘磬日未曛徙倚橫斜眩銀海憶昔西湖極遊歷
真與逋仙澆嵬磊後知色相端有空百念灰心付真宰
我我茅君儼不死秦帝嘉平年首亥精思萬林元炁存
衆卉羣芳羞皚皚閉門緹襲坐蒲團長恐夜深風雨改
廣信奚君靜能家鵝湖以太府掾出補南康簿
予慕其仕止皆武夷先生講道之地叙言其異
同幾於贅因成長句亦欲知夫先賢箴警非二
途近世學者駸駸虛玄則知武夷晚年持守之

論非矯可不慎諸

鵝湖盡日鐘磬清不聞昔時絃誦聲愛君卜居在其側
編簡插架猶談經當年羣公水蒼珮粲粲寒芒德星會
投壺雅爭非世情餘子承風增毀背康廬招提無極篇
希夷入道從茲傳百年脣吻互嘲鄙經緯妙密同先天
兩地斯文實元氣宦遊家居總奇事稽古紛綸三萬言
顏生屢空心晏然

次韻王道士

丘真人弟子其韻
不雅馴姑答其意

潭潭古僊浮玉顏憫世壯志金城堅丹霞紫壁接霄漢
過客弔古猶思賢王君碧瞳水蒼珮深恨望諸書絕燕
丘公蟬蛻七真化青史誰能繼二班

送馬季權之官平江州

碧梧丞
相兄子

咸淳十載兵塵高江漢之水纔容舠眈眈太傅亂天緯
擢船兩翼鳴春濤中書蛛絲守空印片紙除書魚貫進
相府門前青草深破席疎簾雙白鬢扁舟疾走歸番江
百城破竹爭迎降紛紛成敗付野史玩芳壩臥唯軒牕

往事淒迷踰四紀華屋空梁歸逝水洞庭木葉三閭愁
淮南桂叢八公死京城即今相邂逅傾蓋忘年總論舊
潁州推官家譜傳岳陽樓頭水浮天

宋誠甫押送交趾使之武昌

飄飄蒼珮乘風來下視漢水如浮杯坡陀環堤舊亭障
鐵笛穿石聲崔嵬武昌之魚不可食昔人作歌何寂歷
隔江小城大如斗枉使邊軍暖鋒鏑古來相傳用武地
今作薇垣鎮官吏腥血繁纓金齒來犀皮屬甲雕題至

碧瓦門深鼓角高羅庭椎髻聲嗷嘈銀甕蒲萄雲葉重
錦羶叱撥風花驕深知王臣有奇莫蠻使低頭輸密款
勸君莫登黃鶴樓勸君莫停鸚鵡洲黃鶴之人白雲杳
鸚鵡之客蒼煙愁愛君手中青鏤筆能寫牙籤三萬帙
迄今舊史難整齊屢屈先皇詔頻出玉堂日正槐影長
汗青之簡光熒煌請君直書亡國事還作觀風寰宇記

送濮陽陳景臯之官忻州

陳侯直氣摩青雲天馬脫駕羞駑羣毳袍昌言高坐聳

餘子俛首卑塵氛探囊竒策得要領炙轂妙語通氤氲
京城久居閒冠蓋酒觴基局忘昏昕平生植竹嗜好古
膏沐服食童顏醺往年濟陰試敏手桑柘戢戢春田耘
政成烏府考上上擊鮮釀秫歸榆枌窮冬邂逅色骯髒
近錫符竹州名忻自宜骨鯁任獻納或佐輦轂輸忠勤
羣公歎息各賦詠跋馬操袂愁離分緬思河東舊雄鎮
甲騎出塞宵踰汾即今樓臺歌響集棗下纂纂紛紅裙
愛君胷中人物論發硎破的無虛文蓋公之堂本清淨

解帶臥治收奇勲此君相從匪朝夕
畫簾煮茗看鑪熏
送湯道士降香武當山

紫衣山人眼如月朝捧天香辭鳳闕
柳絲輕拂桃花驄
屈曲層巒過俊鶻澗中黃銀如僕姑
清淺閃爍隨菖蒲
水流東南天轉北橐籥妙化誰為圖
沈沈玄帝道淵默
手握神機合無極密調六氣佐璇璣
魑魅潛藏百神職
暮春之初傳降靈閱世已久難稽評
龍虎之章端莫測
龜蛇之光杳無跡

過高郵湖

七十二湖春浪濃風刀剪霰跳玲瓏參差凍柳皂纛重
偃首俟命朝珠宮淮南田父身龍鍾灼龜瀝酒占年豐
舊秋積水挾豐隆長魚揚鬐蒲蕩中桑顛高下棲冥鴻
黑禾生耳隨飛蓬瓢囊扶攜出城東至治天子達四聰
詔書寬大蠲民農秀麥葦葦翠織茸赫日出海扶
桑紅歲熟於酉年相逢擊壤鼓腹歌時雍展牲美報
湖神功

趙昌荷花

我家東湖三百頃，瑞錦縱橫綠雲凝。
森森曉氣天香飛，星斗光沈水花淨。
遠如嬰兒脫文褓，近若胎仙臨玉鏡。
瓊杯欲側雨絲垂，金掌初調露珠定。
盡將機心付鷗鷺，小雨輕煙穿短艇。
京塵烏帽二十年，夢入滄洲寄清興。
趙生畫意不畫格，淺粉輕砂養真性。
韜精斂容羞自陳，三沐無言月華靚。
邇來馮於號能事，老嫩風晴毫髮證。
玄黃已辨神俊枯，逐影之人道中病。
高堂視此青琉璃。

香色俱忘保清靜

京尹旌門

泰山之溜石可穿磨磚為鏡不問年人生作事貴苦堅
砥節厲行通蒼天武清之祠世所傳出門重趼神已憐
五里一堠拜漸前寶鑪當曾起霏煙念我母疾醫難痊
帝叱二豎沈諸淵秀眉鶴髮人中仙伯仲叔季舞蹁躑
脩齡已盡銜苦冤烏傷栢慘羅墓田劉愷丁鴻孰為賢
煌煌神州風化先槐柳表道綽楔懸搢紳交喜聯序篇

太史屬筆慚非椽

乘鸞吹簫圖

繆公荒淫亂天紀
纍纍宮中四十子
懷羸復作重耳妻
匪盟相揮國深恥
娉婷弄玉誰復看
參差窈窕能合歡
築臺虛聲出天外
詐言後夜同乘鸞
人言神仙能不死
索泉之墳露遺址
哀哀黃鳥飛復來
良藥刀圭竟誰致
高辛之女隨槃瓠
漢愁匈奴遣公主
一身能解百城圍
鄙計咿嚶笑千古
天台之事尤荒唐
劉郎阮郎歸洞房

石橋雲深樛木胷披圖相看儼同傳

雲岡圖

為王叔能作

白雲晃晃虛飄飄羣峰磊砢通危橋蒼髯側挂截地脉
素練直下來山腰是中樓閣誰所居翠篁高拂寒光遙
憑虛望遠意莫盡振衣獨立搏扶搖王侯出守山水郡
逞懷盤礴窮清寥一日不見輒憤憤臥遊想像歸生綃
信知俗子謝不去濟勝有具難為招

贈吳江宋尉

太湖三萬六千頃，擺掇秋風政相並。吳船跳擲如飛梭，
鳬雁參差白雲影。連年田舍無炊煙，吳船出沒平湖前。
縣官打衙入湖去，弓刀夾棹魚升天。元憲之孫為少府，
岸幘看山揮玉麈。飛蝗避境虎渡河，吳船雖多奈我何。

與相士王月屋

世途紛紛黑如漆，暗中摸索端有術。何人竊藥廣寒宮，
碧眼琉璃論得失。麀頭之子藍且醜，牙籌夜深鬼神守。
麟臺功次不論渠，當道相逢須疾走。

廬陵梁醫濟生堂

上池之水人莫識三揖東華借餘瀝瞳光透碧千里懸
二豎蒼黃離社席南康昔有劉神醫鶴骨變化芝朮肥
入門逆意望且走吾今見子同其機

次韻史允叟檜屏

蒼雲之根百歲植巧匠屈曲空揉蟠淨如翡翠立亭下
矯若么鳳倚闌干崢嶸要使頭角出鞭霆駕電超雲端
扶春萬條豈不好猥瑣籬落迎霜殘君不見姚江參天

兩雙檜至今風雨之夜猶清寒

越王尉餘姚嘗植雙檜於尉治

次韻蔣遠靜

蔣氏祖五代末與僧為友僧落魄乞食市中六七兒常負囊從之一

日與蔣浴江中視其背有目蔣驚異是日僧化去迺彌勒也留布囊與別且云蔣氏子孫

當代有進士

唾壺麈尾手持白眼對客客不知出門俗子多敗意
三語之掾真吾師曉窗新沐綠陰淨碧雲奇峰生九疑
隔林書聲入幽耳茶甌散花酒浮蟻百年行樂在適意
燕領頭顱空萬里君不見燕山俠客多苦寒出門悲歌

來日難

同龕彌勒誰總持沙上偶坐忘所知布囊相傳陋七葉
密記端是人天師愛君清言漱金石酒酣硬語輕承疑
亦知造物端戲耳一室尸居旋磨蟻東鄰花發西鄰歌
咫尺相思隔千里陳郎之約不可寒我眠卿去人所難
廬江羊孝子兵難時兄弟三人與其母被掠為
奴後廿年復得完聚郡表其閭

君不見觀津竇廣國傳舍沐頭深記憶時來徒步入長

安握手相看淚如滴又不見杜羔孝感為尚書兵前失
母長歔歔一朝老嫗忽邂逅郎君玉貌猶吾夫淮源鐵
騎排雲來戰骨積雪飛寒灰小兒纍纍繫馬尾鬼妾赤
脚驅車迴黃塵漲空日將暮母子弟兄不知處只今總
是太平民却識當年亂離苦人言缺月定有圓馬能生
角石可穿亭亭高門拱槐柳更灑鴻筆傳青編

送潘元卿績溪邑諭

君不聞黃山種松法纍纍如珠茁如髮十年拱把百年

梁華表相看化鑿魄又不聞婺源之山高入雲黃流夜
作河漢奔醜渠漩渦濟川具怙首萬折歸天門魯中之
壁神所惜龍馬成圖帝為錫韋編索隱年益耆此道誰
言深默得紫陽老人心宵高蟠髮執簡窮秋毫即今羣
經束高閣上擬混沌中唐堯拱手臯比立環堵哆口紛
紛角門戶君看黃山之松婺源水師友根源政相似

次韻黃松瀑自廣信見寄

開元天子書石經雉頭焚却邊宇寧合宮宗祀廣致敬

底用物馬登云亭林林碑臺刻新出嘉禧殿前稱第一
小臣捧詔渡江南薨尾渠眉耀晴日裝成分賜諸王宮
餘墨淋漓遍孤棘古文偽出今文訛斷簡誰能究佔畢
黃僊盡日鉛槧忙語言冰雪容堂堂明時孝治邁千古
願將鴻筆歌陶唐

時奉旨刻
八分孝經

題黃居寀蒼鷹擊雉圖

陂陲肅秋塵四起逆風雉飛疾如矢蒼鷹矯矯凌空來
注目穿霄紅披靡山雌藏頭入荒篠回視其雄端一死

玄雲摩盪寒光浮側身翻雲轉輪翅急如冠軍赴猛敵
緩若計士藏深智蜀山巍高翠周匝狹徑交衢不容駟
黃生養之愛神俊勇氣縱橫怒盈皆想當落筆望平坂
回首當關真劇戲君不聞箕裘可學端有傳諸孫射生
養殘年

黃荃養鷹學畫鷹
諸孫皆成獵師

送廬陵陳存道赴廣州教授

君不見端平崔相國竹杖角巾老辭蜀清名高節耀千
古寒菊孤香出林谷又不見咸淳張狀元落落大對三

千言流離抱忠葬魚腹要使名字傳遺編即今聲教震
南朔此州文獻端磊落荔枝一色紅雲蒸菖蒲九節清
溪明當年中州人物論風度曲江之公唐帝顧吳儂
父互譏評坐使官曹異銓注吾聞八桂山峰如玉簪衣
冠之氣連青雲穹龜負碑百神拱色羊跨乘羣仙尊翩
翩陳子天都客萬舞充庭考金石笑觀滄海陋浮漚鵬
飛暫作天池息

送毛道士降香嵩衡淮海

我所思兮在嵩嶽神清之洞何駭愕參差弄月秋氣高
王子飄飄醉騎鶴少室山人蕙帳空君今駿馬凌春風
山中齊聲呼萬歲我欲同君學蟬蛻

我所思兮在衡山重華玉珮聲珊珊芙蓉石床秋水冷
木葉飛燈光耿耿軒轅道士人不識澗底拾薪鑛白石
我欲與君上九疑萬民樂康明聖時

我所思兮在桐柏寥寥帝鄉今莫識潛流倒注平淮成
天塹曾為萬人敵金龍護簡帝令森蜥蜴俛首穹龜沈

我欲與君探其底五兵長橐樂平世

我欲思今在南海鐵網珊瑚援手採沉沉雲氣方壺深
絳節神君侶相待海中颺母方頑癡朱書短札能捕之
此中奇觀通扶搖吾欲與君觀沃焦

贈番禺劉生振

我欲贈君珊瑚枝君言不如貽我雜組辭我欲贈君懸
黎珠君言不如貽我盤盂書長衢飛塵日卓午觸暑東
遊甬江潄目光陸離衝紙背徑上河源窮織女龍圖龜

書杳無跡弄九冥搜矢穿的空林看天無底青虛室生
雲十分白幽蘭叢深不當戶盤露凝膏敵瓊醕泰山積
溜石可消鐵硯玄花散晴乳林林白袍校詞藝鵬鵬淬
鋒儼初礪身同蝶化入寥天欲伴飛仙更斫桂彤庭會
弁開祥雲河目海口真天人昂昂胷中治安策慎勿謾
與深彌綸萬里之行生足下黃河層湍及奔馬參差柳
色暗皇州龍榜高懸動朝野

句曲山迎真送真詞二章

往歲在翰苑嘗草三
茅君制書近張伯雨

道士寄示陸魯望句曲山朝真辭二章蓋每
歲大茅君十二月二日相傳繇天台歸茅山
春三月十八日復歸魯望所製迺十二月而
三月獨缺予不檢用韻以補後章繹繹字書
即繹字古率字作率呂道士過三茅因書以
寄且為異日朝真之資伯雨詞氣清簡必以
予言為
陋也

參差窈窕行雲急翠旌飄飄露華濕神君夷猶疑未來
矯首精思各山立瑤臺章徹星斗冷碧扉丹透紅流影
春雷迸壑人不知獨鶴眠松已先醒

右迎真

妙顏朝迴寶衣解乘龍高駝賦遄邁山中老人年送迎
一酌寒泉過玉瀼翠氣紛霏森孔蓋挾以流鈴光繚繚
帝子高歌歸去來白月追雲送飛珮

右送真

龜蒙詩云九華磬答寒泉急十絕幡搖翠微濕司命
旂旌未下來焚香抱簡疑神立殘星下照霓裳冷缺
月纔分鶴輪影空洞靈章發一聲春來萬壑煙花醒
紫雲鳳髻飄然解玉鉞玄竿儼先邁朝真弟子悄無
言再拜碧杯添沆瀣火鈴跳躍龍毛蓋腦髮青
青漱綈綈萬象消沈一瞬間空餘月外聞殘珮

贈呂與之

碧窗獨對中秋月，
作怪腦華雪霜白。
瘦筇直上大茅峰，
長吟冥思啓玄籥。
綠蘿丹騰紅欲走，
我欲拾之難在手。
嗇精超形朝紫宮，
下視塵寰等蒼狗。

送瞿伯器還吳

輕鷗不受機心縛，
良馬端隨敏手馳。
鄞江井邑十萬竈，
簿領積几窮緒披。
瞿君坐曹談笑決，
長官驚誇里閭說。
豈惟煮茗挹清風，
復解停杯問明月。
澄江雪浪催歸舟，
洞簫聲咽行雲留。
明時掄才在濟用，
佇看公府交章酬。

竹素園

緇帙不作飛白體
漆簡端微殺青書
哀哉瀛王兔園冊
自比稷卨今何如
陳生歌聲夜漫漫
手織雲錦餐琅玕
丈夫書功夙有願
蕩節束帛光丘樊

松聲樓

層樓突兀觀芸芸
萬籟沈寥天地分
初如盤車出層巘
宛若幽磬穿孤雲
上方禪寂念不起
但見白鶴來繽紛
金鐘風篴儼相答
有客掩耳元無聞

阮受益攜郭功父杏山詩來求題迺知名門所作因次韻

葛翁迎曦侍東皇笑指梅根之陽岡手揮桃李植文杏
春至古澗流紅香杏華飛時爛林谷錦繡為天漫翠木
即今不識空陂龍猶指當年舊乘鹿紛紛機事危黃閭
彼艾之植誰倚蘭青松迴風太古籟移居之老時回環
兩曜跳丸今幾載阮氏隱居端儼在金章紫綬先譜承
雁塔龍門耳孫待翩翩俊翹海門山我欲挾之周九寰

精思義皇粹六籍迄願閉戶窮鉛丹文辭濫說眩嫫母
正色危坐當前顏神仙之說不可學月窟謹視環中環

送林以道歸括蒼

書生作官端作勞撫拾歲月如聚毛行年六十甫墨綬
又見納祿還林臯磻溪之翁誠有道采芝妙顏夸不老
明時貪賢在壽俊未信吾徒竟衰槁君家周官擅彌綸
經緯表裏通天人那能望塵拜太守振衣黑髮前旒陳
松花霏霏散黃霧春盡還家美無度篝燈讀書目光曙

承明之廬我當佇

題明皇擊梧桐圖

胡兒手持玉環侍君側
睥睨阿環非一夕
宮中秋葉奏清商
笑擊孫枝工按抑
嶧陽之材雲門曲
能使薰風生衆綠
如何促召羯鼓催
鬧紫妖紅看不足
馬嵬陂下催進程
琅璫檀板悲霖鈴
緬思康衢擊壤叟
帶索行歌不知老

清容居士集卷七

欽定四庫全書

清容居士集卷八

元 袁桷 撰

歌行

吳船行

吳船團團如縮龜終歲浮家船不歸茅檐舊業已漂沒
一去直北纔無飢清晨煮茶茶味惡薄暮熬蘘蘘力薄
不憂江南雲氣多止畏淮南風雨作去年水淺留金溝

今年水深上新州終朝但知行客苦盡歲不識離家愁
大兒跳踉新九歲小兒學行蓬作地維舟未解碇舟牢
盡日彎篙仰天視吳人不解碇舟終日操篙船頭娶婦通姻譜知是
淮南捕魚戶寄語鄉儂莫怨尤它年水深為汝憂

淮船行

淮船船薄薄如紙客行船頭怒如鬼布衫黑漆鵲雙拳
邂逅相爭渾欲死船長不識丹腹巧却識江雲侶飛礮
風來急鼓響瑟瑟轉艣爭篙復喧鬧淮東燒鹽白如玉

我船輕行一萬斛淮陰米麥如京坻我船破浪帆如飛
為語吳儂莫相勝昔日汝輩同嬰兒蜿蜿淮山起晴翠
船已辭鄉不相對轉蓬它日望江南猶勝當年吹出塞

越船行

越船十丈青如螺小船一丈飛如梭平生不識飄泊苦
旬日此地還經過三江潮來日初晚九堰雨慳河未滿
當時却解傍朱門醉眼看天話長短年來官府催發綱
經月辛苦鬢已霜布裘漫作貂裘具入門意氣猶猖狂

自古魚鮭厭明越明日今朝莫論說買魚沽酒不計錢
被髮江頭傲明月勸君莫作越船婦一去家中有門戶
沙上攤錢輸不歸却向鄰船盪雙舫

清明行

東風吹柳鶯眼新家家清明忙殺人微雲細雨作春色
輕車急馬團飛塵大墳崇臺梵花石新檜珠幢當戶植
小墳纍纍俱土堆高下尊卑人莫識豚肩韭餅雜珍味
水飯飄零多古意把杯直欲酹重泉頰首填膺下真淚

須臾無言各環坐折柳攀桃爭噉炙新愁已向眼前寬
舊事翻疑夢中過行客徘徊亦留勸薄暮前歌下村坂
悲歡盡日總春風白髮年年不知換君不見江南卿相
墓五鳳飛樓鎖煙霧諸郎錢癡恣歌舞不識當年出勤
苦楊花飛盡猶不來空有啼鳥滿荒樹

河橋行

黃河之船如切瓜黑金鋪釘水爬沙高桅不肯著船底
四面綯索相交加輪囷薪橐浮山來淮船爭避吳船開

往回南北任衣食不學蕩子多嫌猜好風千帆亂流去
我獨抱辛走行路從來宴安多後虞一失天公不相顧
鮮凌已過桃花來黃河正月為解凌水
二三月為桃花水汧流九曲揚飛
埃不聞赤鯉上天但見魚鼈爭喧豕船前養驢豕同
圈借力於驢共牽挽莫嫌我鞭太麤毒大勝江南人代
畜

鞦韆詞二首

鞦韆高整垂楊樹紅綠周遭華表柱誰家女子惜餘春

東擲西拋不停住不停住日將暮莫送飛花上天去雲
間緩聽玉參差為問乘鸞在何處

河外吹沙沙袞塵鞦韆架上望行人桃紅柳綠今如許
却背春風踏沙路踏沙路不歸去流鶯紫燕驚相語明
日清明應未知回首江南夕陽暮

天祿硯滴歌

為瓠山
參議作

君不見南陽宗資墓傍地刻石稜稜絕相似荒榛暗草
風雨頑墨本摩挲了無意又不見光和玉堂銅作模範

沙引水如渴烏清流我輩不堪用空與乳臭供歡娛那
似南唐李中主玉軸牙籤日容與聚金為寶化黃銀一
寫形模足纖鉅口銜紫芝不敢茹微捲清波恣吞吐千
年異質變真態晝日書窓起煙霧慵軒老人金鑾僊筆
底萬斛醺清泉坐令口吻不敢燥俛首效用誇無前麒
麟瑞世那可忌獬豸觸邪誰顧憐要知此意政相類肯
與石鼎同烹煎憶昔漢家劉生滯空閣青藜一星隕飛
魄彼將辛苦了殘年猶勝時人譏寂寞江南病子塵滿

骨萬事無言成鵲突願求一滴洗餘昏却怪王公無長物

新安芍藥歌

送胡伯恭之婺源

洛陽花枝如美人點點不受塵土嗔輕朱深白鑄顏色
高亞綠樹爭精神那如新安紅芍藥透日千層光閃爍
碧雲迸出紫琉璃風動霓裳凝綽約我聞種花如種玉
盡日陰晴看不足微雲澹蕩增寵光細雨輕濛賜湯沐
何人看花不解理香雪紛綸手中毀酒酣跌宕空低昂

得意須臾竟如此翩翩驪駒雲中君愛花直欲留青春
青春如流欲歸去明年看花君合住

天瓢歌

天瓢之液如黍珠緹以十襲拱萬夫帝青寥寥誰可上
回風扇坳揚焦枯何人夜坐守瑰室九闕清嚴集虛一
河車歷錄雲迴環帝鼓奔騰山鬼泣中有一老翁絳旂
朱幘鞭飛龍手持赤字書直入玄冥宮取瓢上天去義
和側馭追豐隆人言此瓢不易倒瞬息人間成浩漭聊

將戲劇轉清涼玉散珠跳為渠好積神為寶寶乃成語
默變詭通僊靈丹臺紫府杳無跡丁公壬女徒多名張
侯之妙不可詰見月入水月豈濕解衣倚樹寒滿襟遠
視銀河暝如漆

晉寧丁節婦歌

明月何團團不照孤飛鸞妾心無虧盈畱作白頭看堂
前青桐樹慈烏旋繞來無數朝引三兩雛返哺日落聲
嗚嗚誰人挾彈窺我烏守樹長泣眼為枯人生莫作陌

上花東風飄蕩隨泥沙望夫之石何亭亭不如長衫立
素屏流梭夜織燈青熒黃姑側聽中屏營天帝與植雙
桓楹木盤可鑽河可塞千年苦心誰復識

哀牢夷

送張子元
僉事雲南

哀牢夷蒼山疊翠雲無梯洱河西傾去無底晴日倒射
紅琉璃相傳沈木兒背坐曾遨嬉築城蜿蜒似龍尾千
古髯君乃其始縛繩駕長橋皮船中蕩搖危顛石樓高
百尺子孫生長今漁樵空林明月手可拾仰飲飛流鬚

髮濕寒藤胃徑側足行飢猿兒啼鼠人立慘淡虛無間
鳥道開人寰峨眉東望止一髮參旗玉井閃閃上下隨
躋攀君不聞木皮岡前九折坂客行胡為車欲返又不
聞青溪關上三硯城纍纍戰骨耕未平輕家許國要有
道矍鑠是翁誇不老張公子富有行繡衣青春照瓊英
笑跨紫燕辭天京朝餐五粒之松子暮食側生紅入齒
從來蠻客尊漢官但飲亡何端有理南飛雁足何懂懂
不能與日隨西東相思望君日西下去天一握疑有雲

氣時相通

安南行

送李景山
侍郎出使

輜軒使者安南來
紫泥封詔行風雷
濕雲翻空海波立
鐵網山裂狂蛟摧
神京煌煌鎮無極
火鼠燭龍窮髮北
彈丸之地何足論
蚯蚓為城霧為域
瘴江如墨黃茅昏
羣蠻渡江江水渾
千年白雪不到地
十月青梅猶滿村
赤脚搖脣矜捷鬪
竹箭藏蛇雜猿狖
崛強曾誇井底蛙
低徊自比泥中獸
龍飛天子元年春
萬邦執璧修臣鄰

朱干玉戚廣庭舞笑問銅柱今何人君不聞重譯之人
越裳氏有道周王輸白雉又不聞防風之骨能專車神
禹震怒行天誅李侯桓桓水蒼珮舌本懸河四方對後
車並載朝未央稽顙九拜乞取金印歸炎荒

次韻黃可玉古墨行

寶刀曉割千歲松神膏摩盪長檠工明窻飛塵散玄粉
七劑直與黃金同澄心欠伸初睡起綺疏碧芽烹火龍
金星濡毫試輕重雪跡點點畱羈鴻嘗聞老奚對膠法

經月下擲清池中蟄如寒蛟纏鐵柱霹靂光紅與神遇
晴暉淡蕩浮雲陰咫尺鍾山隔朝暮潘郎再拜口流涎
手揣不敢汙其瓊睿思殘珪密封識舉世那得窺完全
絕憐江南文治極清賞沈著忘籌邊玉清我我墨卿泣
此寶脫幻今無傳星灣寒泉白雲宅中有舊物懷杯圈
銅魚飛符不易合金釵畱股那有緣撐腸拄腹貴善用
知白始解玄中玄暮年長物等嚼蠟借此寓意哦詩篇
鄭公諸孫保遺笏滌志黽勉窮韋編慎勿小智窺寥天

嗚呼李生之墨三百有幾年不如陳郎墨守行千年

李宮人琵琶行

先皇金輿時駐蹕李氏琵琶稱第一素指推卻春風深
行雲停空駐晴日居庸舊流水浩浩湯湯亂人耳龍岡
古松聲寂寂歷歷不足聽天鵝夜度孤鴈響露鶴月唳
哀猿驚鷗絃水晶絲龍柱珊瑚枝願上千萬壽復言長相
思廣寒殿冷笑蘂秋簇金鵬袍香不留望瀛風翻浪波急

興聖宮前斂容立花枝羞啼蝶旋舞別調分明如欲語
憶昔從駕三十年宮壺法錦紅茸氎駝峯馬湏不知數
前部聲催擅板傳長樂晝濃雲五色侍宴那嫌頭漸白
禁柳慈烏飛復翾為言返哺明當還朝進霞觴辭輦道
母子相對猶朱顏君不聞出塞明妃恨難贖請君換譜
迴鄉曲

渝州老人歌

新城彭
大雅築

渝州太守築城瞰江堅且牢月挂斗柄山鬼號州民纍

累下江去蜀水入漢纔容舫渝州何噉嘈攀緣翠木叅
井高不愁灩澦作人鮓但願浙米雲安去如馬憶昔彭
太守晚得一州大如斗征西將軍華表柱白鶴不來猿
狄守小兒舞榭紅離離大兒挽車上棧遲渴飲古澗之
層冰暮宿古松之危枝渝江之水人馬瞬息渡排石列
柵猶支持年年草青記新厯不識烽火平安是何夕赫
日涌紅輪金雞飛報渝州民空梁燕回候歸語小牆花
發舒啼痕渝州老人面如漆家住金陵年七十含辛老

入巴江路猶記墳前白楊樹前岡甕崩流後岡蜥成丘
社翁相詢傳父祖里婦驚猜訝吳語澆酒酌墳封四尺
程氏之墳從此識君不聞武擔之山五丁土歲歲春風
啼杜宇

大雨醉歌

寄王
待制

海風吹天黑嵯峨九衢積溜分江沱壞墻羣蟻上枯木
方池遊鯉跳鳴荷似聞南鄰王學士閉門把卷工吟哦
高張障泥倦行水垂簾倚枕遊槐柯北鄰老生病無力

玩易忘象窮義媧垂楊詵詵翠旄舞幽葵湛湛朱顏酖
憶昨祠宮醺雷所被髮繞甕揮且訶縛焚搏泥肖龍狗
嚙酒噴霧刑牲鵠寸雲在手不受令挾以風伯飛塵劇
虛皇神功絕聲色髯羊怙首辭巖阿君不聞夸父逐日
死飲河愚公避影跡愈多曹相畫一日亡何草廬高卧
梁父歌板築飛詔起雲蘿百年兩曜如擲梭志士惜日
鬢益瞠會須深泥絕行道免使龍襪之士肩足相累摩

龍尾歌

送文子方著
作調官雲南

朝辭龍尾道暮往龍尾城七尺遊龍當道鳴春雪未
解四蹄輕憶昔哀牢夷來漢賓蘭倉夜渡歌苦辛皮
船之浪墨雲沈沈繩橋之雨青泥淫淫登山採桐皮側見
五粒松手攀欲入口疑是沈木肯坐慘澹悲回風鳥飛
不能住哀猿忽相逢旁有僊耳翁為言太古之遺蹤諸
葛丞相韋郡王村村列祠堂瓢笠銅鼓羣巫舞牛穀蘭
藉羞瓊漿六詔之王無歷紀唐帝傾師邊將死建隆天
子不用武王斧手畫大渡河兩股蠻酋易馬來黎雅恣

言茶錦不當價神武皇帝開聖元難猶窟穴張王官
筐筐歲入長安道賈客辭家不知老文著作作聽我辭
去天萬里夷民疲織罽瀝猩血煎金鑄褱蹠夜行碣
門夷疾追平明出關面如泥却來京師望塵拜簇金
毳袍向市賣文著作今典雲南之選部目光透牘提
筆署翦彼荆棘薰蘭當戶西南之人手加額太史重
修考功格

月海歌

水國紅葉下萬山白嵯峨扶胥無垠接天際望舒力挽
沈金波人言老蟾那有光為借三足之鳥起熒煌烏已
入地蟾在天此說詎得然或言大塊蓬蓬氣為主浮空
五色神后輔顧兔在腹不得吐下入八瀛金碧聚貝宮樓
臺珠結戶穹龜前驅老蛟舞千人之目皆在水各持一
月得歡喜夜闌斗轉銀河傾變滅消沉去無趾

敬亭歌

送鄭子寔
遊敬亭

東窗暮暮羅衣單抱琴背日隨鴈還今年六月居庸關

馬蹴石子流彈丸曉渡灤河水水渾不見底中有三尺
鯉素書不成字似疑戒我慎出入五侯之鯖過客止羹
覆手爛將奈何仰視流光去如矢行路大難歸樵空山
或言山有虎豹嶺有榛菅歸漁于河河有蛟鼉去將隨
波舊家汭渠溝已塞錢塘煙蕪歸不得敬亭白雲何離
離二僊霞衣坐翠微手持紫玉簫和以丹桂辭大言冷
泠小言累累勸子勿為道途苦幽蘭深谷不當戶空青
滿巖玉流乳手繪朝元之圖萬神舞

秋江釣月圖歌

南山舞空趨翔鸞北山人立如啼猿長流東來貫其腹
謂是浙水屈曲萬丈之上源大魚奔騰鰭鬣焦小魚委
靡隨江潮中有白玉蟾落落五采凝不消人言此蟾在
天主陰魄淪沒何為水中宅籊籊千尺綸蟾永不受吞
廣寒高居凌紫清日逐烏御不得停愛此江水碧倒空
浴影潛金精感君纏綿如有素瞬息還須上天去君不
聞任公子東海投竿非小智又不聞嚴先生羊裘古瀨

成高名君家慈母占畢逋百尺樓觀端可居黃金之鈎
不復理明月年年在秋水

二老歌

王景先省郎幼孤祖母及其母鞠之今迎養京師

烏啼風滿窻機鳴月當房辛勤三十年護此玉雪郎大
母呼孫牀下讀阿嬭烹雞炊黍熟黍熟不敢嘗命兒奉
姑旁姑言春在長安枝東風滿林深折之一折不得語
再折春無臉白雲何相隨下馬忽在戶驅馬還家上堂
拜婦姑繡衫錦為帶長安之花果如斗不辭看花飲春

酒

三馬歌

東坡三馬贊本

羌水渾蜂解屯瑞至人率獸尊參以陳仰天門龍為鱗
炳虎文髯悍獐效伏馴鑿鏘鏘馳道遵帝乘虬相攀雲
逝無留返崑崙

廬陵劉老人百一歌

昔聞寧王嘉定時平淮如掌糧如坻襄陽高屯十萬卒
武昌金埒饒軍資西蜀環山堆錦繡滔滔南紀喉襟首

峨眉積雪不動塵玉壘浮雲古今守當年行都號金盛
翠箔珠簾爭鬪勝西湖不識烽臺愁北關已絕強鄰聘
寶慶天子來自外即朝諸侯土疆日窄邊庭憂大帥偃
蹇藩鎮侔小壘椎剝租瘢稠春城絃管暗煙雨四十一
年變滅同浮漚咸淳太阿已倒持銅山之賊專宮帷樓
危金谷山鬼泣舸走白浪江神悲老人年周一甲子
至元大帝車書合文軌每話承平如夢中萬事東風過
馬耳只今行歲一百一坐閱天地同昨日秭歸聲苦紅

葉翻邯鄲熟睡黃梁失門前手種青桐百尺長笑指截
取諧宮商少君荒唐方朔誕不如老人親見深谷為高
岸我孫之孫為玄孫翔鸞峙鵠高下飛集駢清門憑公
欲補先朝事濡毫更作長生記

月鑑歌

騰騰玉兔光爬沙人言受日為精華又言蟾蜍老不死
側身躍入廣寒裏信知七寶合無跡借取山河成戲劇
衆人望月見盈虧君今以月為準式我聞初生時纍纍

亭亭三五超象緯雲從于龍魚有水君臣得志何慷慨
千古消沉竟相似須臾寒光海中匿山鬼悲吟虎狼藉
華亭聽鶴流年空北海牧羊深雪積我觀帝城之月如
玉輪團圓的的無纖塵中有隱默士範月為鑑驚都人
大言穿楊葉小言貫蠟肝太虛氤氲眇窮髮引酒高坐
歌闌干

玉署黿峰歌

答伯庸

星爛不敢隨亦如男子墮地在文綵獨抱靜性無邪歌

女媧五色餘刀圭化為蓬萊東海之虹霓神君方瞳怒
凝睇不如百鍊積鐵永從西方奎日有三足鳥其光映
顧兔海有三足鼇神山顛靈濤吐吞出沒無定時一叱
使之來玉墀大承虛皇小挾銀漢黼黻帝裳追琢廟璫
森嚴巋鎮帝署百鬼却走不敢侮其或敢侮怒絕其
緒粲若珊瑚枝熒熒三秀姿文理密察儼素樸孚尹旁
達藏玄機我昔坐其側耳冷心彷徨經旬卧向壁夜夢
天孫手授雲錦交龍章漆書誥盤傳古昔中有寶珠香

無跡散之六合捲如席視之不見聽以息元氣氤氲龍
馬興文茲石點首詔爾小臣慶非煙霧出如絲綸矢心
濡筆靡有數萬古作式永無極

秋風歌

貞答子

七月霜清鴈南起美人亭亭望秋水鰲峰石畔金蓮彫
襪被中庭候行止至治丞相歌堯民矢心前榻詞如雲
平原黃低翠交舞寶檣肅肅方調辛魏莪虛皇傳令速
萬姓樂康真景福使臣覘言黍未熟八十一車馬停足

東門行

神皇揮戈度黑河四廂捧日肩相摩金袍珠紫帽七寶
剖符帶礪功難磨年年舞馬魚麗列宴罷玉帳經南坡
嚴更傳警夜氣肅貌貅千列環象馳華蓋西傾星散雪
殿前蘭膏猶未滅千金七首肘腋生拉脅推胃慘凝血
平明羣兇坐周廬傳旨東西騎交迭棄馬之邦身被繫
執簡以朝筆猶舌煌煌厚恩浹肌髓悲淚填胸痛天裂
金繒盈車內府竭虎視眈眈終一啞

廬陵海月道人歌

飄飄白玉丸空明，歷落行雲端。世人不信之，謂是太古
圓缺相循環。吾欲與子窮端倪，一葦巨浸無東西。金精
貫珠宮，倒影流銀泥。飢蟾飲水不入吻，五色吞吐成虹
蜺。迺知山嶽積培塿，巧遮世目如以手。茫茫水空輪載
地行無垠，置身浩蕩外。光景常如新，吳剛持斧不得休。
沃焦日夜無停流，紛紛榮辱可奈何。仰天一笑君當歌。

聯句

東湖

舊學蕪三史新居隘一屋煎熬魚煦轍奔竄鳥驚弦擬

整登山屐

伯長

須乘破浪船出關塵已遠

德平

過埭意爭先

歸舶攢桅聚

伯長

浮梁斷鎖懸潮渾江封沒

德平

塍破岸藤

纏戍柵依樟密

伯長

官堤砌石平機閒蠶喚織

德平

砧響鴈

傳箋乍靜喧煩耳

伯長

猶欣輾轉眠鵲橋華屋廢

德平

搗匯

曲河連稠實間濃具

伯長

嵯嚴絕竈煙急裝紅蔽膝

德平

辦

髮黑垂肩估客編文貝

伯長

村家緯木棉生涯疲剝害

德平

世路窘迫遭龕室休行客

伯長

郵亭嘆逝川韓鷹圍獵罷

平德聯騎縱遊旋路轉分支港

伯長

川明幻別天鄧城花已

暗德甬水恨空傳數堠搜唐刻

伯長

題詩紀宋編會堂夫

子像德汲井隱居泉海眼藏龍窟

平

德

山心射鹿田水鳴

伯長

知棹急

岸走訝途遷隱見岡巒近

平

德

低昂橘柚鮮青

伯長

山猶五里

綠樹已千年歸犢如雲擁

平

德

閒花似火然

伯長

芎裳遊女淨

平德蘆管野伶妍繫纜披團氅

平

德

循溪捨竹

伯長

獲徑香幽菊傲

平德土薄假山偏燈火精廬古

平

德

衣冠故

伯長

物全登門論子姓

平德

對坐叙姻聯金魄節窻影

長伯

丹砂

養井淵螢飛光熠熠

平德

鶴唳翼涓涓斗室橫烏几

長伯

方

牀藉素氈魂清時入夢

平德

意得竟忘筌過墓成扃戶

長伯

遵湖復叩舷滄洲迷秀麥

平德

真隱拱朱椽碧洞諸天杳

長伯

蒼珉帝畫鐫梯危頻縮武

平德

像寂且擎拳紫府商霖

長伯

丹書漢澤宣銅鋪苔暗蝕

平德

經皮燕新穿倦鳥辭

枯柳

長伯

遊龜戴旱蓮古奩開激灩

平德

斜穀縐漪連淤塞

菱排劍

長伯

洲乾蓼糝鈿官徵都尉粟

平德

漁納水衡錢王

絕山靈泣

伯長

祠荒野老憐紙旗鄰社開

德平

草廣曲河填

此去真聊爾

伯長

斯行信偶然相幽藏
魍魎

德平

潭黑袞蜿

蛭雅興呦呦鹿

伯長

勞生跼跼驚攬芳真
嚼蔗

德平

寫絕擬

和鉛轍跡蕪菁翳

伯長

麻菴泉耳緣貞娥鬱
龍虎

德平

胄相

紹貂蟬宰木分神隧

伯長

思亭列石筵風霜翁仲老

德平

香

火釋迦專楚些招歸魄

伯長

王官慨昔賢拜峰誰控勒

德平

篆水自書玄屈曲東西路

伯長

縱橫南北阡繁華眸轉電

德平

得失口垂涎絮酒悲宗老

伯長

囊經想地僊房溫連梵

唄

平德

市近接腥膻破露生衣濕

長伯

登坡弱足胼卧牛遺

扁暗

平德

眠鹿繪容虔金刹從茲訪

長伯

塵纓合少蠲伐山

靈運躁

平德

衝雪子猷顛檜暖蜂偷蜜

長伯

蘆寒鳥啄綿蟹

稀整數百

平德

樵夥斧論千淡日收人影

長伯

空嵐漲土埏

蒲葵遮望眼

平德

繭紙論吟篇除道家僮懶

長伯

偷程地主

僂蟻封徒曲折

平德

駒隙漫拘攣碎石行行直

長伯

修篁个

个圓深敷驚雉翠

平德

夾徑聳楠梗濯錦芙蓉艷

長伯

飄香

桂子駢雕楹回複道

平德

斜閣布陶磚刺畫功難盡

長伯

暈

飛勢欲翩奉常陳劒履

平德

尚服錫紘紵憶織鮫人網

長伯

帷凝蜀國旃妖姝汗粉頰

平德

土偶聳高顙祛石當時力

長伯臨淵昔日權只今留黑業

平德

何處覓幽禪燕領風雲

會

長伯

龜趺日月躔蛛窠緣袞服

平德

鼠跡上朱籩累僕供

朝沃

長伯

因僧進午餐佳城蹲五鳳

平德

素業廢三鱣勝已

窮蘭若

長伯

名猶慕偃佺臺空霞珮冷

平德

殿寂羽幢薦觀

主何年住

長伯

真官永世鍵畫梁誰復葺

平德

美蔭久頻腴

木已非真李

長伯

僧宜賤壽錢悲來雲幕幕

平德

恨極水潺

潺重嶺藏椒屋

伯長

斜暉指蕙楊暫歸心未穩

德平

欲去眼

空眩憶昔窮誅闢

伯長

如今猛棄捐慈山名轉赫

德平

因壞

耻誰湔積翠林霏悄

伯長

流波海月娟遠鐘催宿鳥

德平

橫

笛挂烏捷拄笏風騷

伯長

攜壺主僕牽情懷同黍醴

德平

臭味比香荃圓澤休論舊

伯長

華胥復記前乳彪號澗側

德平哀狄嘯雲巔惇族盤殮盛

伯長

通家笑語聞鷓鴣歸棹

德平舴艋逆風沿濟勝應難促

伯長

臨流且賦遄鴈夷歌

逝矣德平漁父卜終焉紫槿遮籬角

伯長

丹楓壓廟堦鍊形

金骨化

平德

團礎土沙堅破屋啼山鬼

長伯

荒碑立老鸛歲

時羞野賽

平德

水旱禱靈筭西帝澄金字

長伯

東湖鑄玉璫

涼颼舟泛泛

平德

晴日草芊芊射鴨縈長弋

長伯

叉魚擊短

鋌酒廬橫矮甕

平德

屠几斫肥拴街市僧袍麗

長伯

招虛販

鼓鬻登臨難婉戀

平德

想像費平銓更欲南窺海

長伯

誰能

北跨燕同心雙繭緒

平德

徇俗走珠蟻朗鑒詞聯寫

長伯

玄

談茗更煎翱翔誠放浪

平德

匍匐類狂孱已乏凌雲句

長伯

時思縮項鰻還家如夢寐

平德

共點曉霞邊

長伯

九月望日送姊歸余氏先塋之廬登其高祖少師墓
相傳謂外高祖忠定王所相余氏之興兆於此支塋
為尚書公墓亦為佳兆十六日早發遵山行一二里
拜外舅之考侍制公守墓僧畏祇迎閉闕叩之終無
人聲山勢左行清興未已借余庵舟過東湖上外曾
祖忠宣公滄洲堂故基悽惋久之舟上埭予與德平
行至月波忠定王所建寺後有洞像補陀示相捨舟
登葉夫人八行太師墓又上五祖堂觀招魂辭暮抵
鹿野拜正肅公祠奠永州几筵行久殊為疲勞是夕
德平抱兒相示眉宇修廣子許以永大十七日平明
過種德拜正獻公墓讀楊文元公碑菴僧洒然非鄭
氏菴比是日德平攜壺同菴僧指領遊大慈七山有
僧年七十餘能道嘉定紹興間事示忠宣公所製滄
洲堂上梁文益重遠想拜忠獻王墓歸復宿鹿野嚴
君命以十八日歸歸遊鮑王祠日已晏余親翁病瘧
復留宿詩成凡一百二十韻繁華感慨悉紀于詩詞

雖不工然二人綴緝之勤有不可不示於
好遊者用識于後云己丑十月某日楠書

遠遊

海鵬跨南雲一去挾浩蕩宛駒踏北雪絕足追罔象宵

征車載脂

伯長

明發燈在幌行邁念悄悄離愁懷養養違

吳始接浙

德平

過越類指掌珠網結遐思羯鼓促新響觴

至不復辭

伯長

駕逸誰能仿明堂企棟梁武庫輸篠蕩氣

合芝蘭芬

德平

學媿蓬麻長大施朱弦清小薦金莖沆雲

間鶴孤唳

伯長

天外鴻橫上曉舲劖層冰午店憇平壤追

攀瞰煙濤

平德

涉歷走塵鞅長淮橋螭薄霧裏驕驪風

臺牛一鳴日觀雞三唱團桑沃如蓋

長伯

宿草亂若經青

帘客沽酒素鬣漁收網心歡沂泗流眼豁恒岱爽追程

騎侵星勸耕農植杖俗厚喜豐登

平德

氣俠存慨慷伊河

既東流維斗復北仰誰云風土殊始覺宇宙廣骨聳終

超騰神清何懽悅鈞天夢非真

長伯

廣寒步空想銖衣入

閭闔芥粒視北垧千官紫府榮九奏彤庭袒摘文翦金

炬

平德

展采簇天仗清都踰咫尺弱水漫方丈絳旗雲霧

開寶扇日月晃仁聲被八表

伯長

德意蘇羣枉泥檢極封

崇芬必嚴肸鬯瑞氣藹重重泰階瞻兩兩駝峰出天廚

裏蹠錫中帑鳴珂接俊彦

平德

正笏嫉偏黨德人笑採芝

逋客棄拾橡茅拔要有方矢來本無嚮湘纍但瑰詞

伯長

越相僅金像遭讒氣徒憤得計身何往豈如及承平相與

窮昭朗君行步飄颻我滯心悵快輕霜著衣帽微霰點

草莽離歌起蒹葭

平德

古製出盆盎先後匪十獲後至激

孤獎城南燈火深塞北音書咄東風漸披拂臘水初澌

養詩成愈加險酒盡未為彊雙眸秋水炯累語春波蕩

經行度崎危

伯長

交友希個儻羈遊棄楚荒遠客憐齊僖

光陰尺璧重事業千金賞

德平

行還鴈塔題復覩鴻都榜

時來戒窘步事至勿技癢脂韋本凡近鐵石乃忠謹詞

林納疵美書田課荒穰列仙會儒癯羣仕趨吏駟陸生

強咿嚶陶令終骯髒貞心百壬避正色上帝享徒為捧

心施莫學畫眉敞功名要無心造物端有相行行遂初

志作事記疇曩

伯長

望洞庭山

海嶽雄前武乾坤入壯懷地臨區澤左

平德

洞接蜀山涯

玄甲呈神禹

長伯

靈鼇琢女媧岫橫青一髮

平德

水引玉三

义鴈翅連雲暝

長伯

雞聲帶雨咭輕煙滋土脉

平德

澍霧潤

蔬菱橘熟金分顆

長伯

鱸肥玉饌鮭稻田碁布局

平德

草舍

篆書齋塔正狂瀾轉

長伯

圩增古岸差畫船誰白傅

平德

香

徑獨吳娃伏翼疑銀乳

長伯

遊鳬訝翠鞵苑存麋鹿過

平德

石老鬼神霾野火分星位

長伯

剛風直帝街浪高驚接漢

平德

天闊欲吞淮鐘遠春聲隔伯長歌長艣韻諧靜依村社

平德

樸間厭市塵哇往事滄浪古伯長輕裘笠澤佳鴟夷奇

策遠

平德

季子宿情乖鈿壁銷朱戶伯長香風墮綠槐卧遊

包景象

平德

目送樂形骸尚憶禾生蠟伯長誰憐竈產鼃江

湖終漫浪

平德

歲月敢安排語盡情如客伯長杯深醉近俳

黑頭宜紫闥

平德

白眼笑青緇門掩雲生室伯長庭虛葉響

階墨花浮雁字

平德

燈粟綴蟲急吹鳴笙籟伯長同雲屑

豆楷行行從此地

平德

去去勉吾儕轡聳王良御伯長帆凌

博望查會須攀絕境岸幘訪丹崖

德平

秋雪

九月十四日
伯長伯庸

白帝欲返馭玄神已先驅南山黠遐睇西館阻清歛刻
雲環珮雜翦水瓊瑰敷金英受剛絜丹桂遭糝塗高標
變鬢髮爽氣通微軀羣陰孤陽儗積素五采腴路修天
鵝疑穴覆野兔呼蟬猶抱殘槐鴈仍驚折蘆漚瀣露莖
溜空清冰柱酥或云勢已盡又言理非殊先時明堂嚴
薄刑蓐收誅浮華敵春斂斂實侔冬輸慘立各動色沉

思儼徐趨鴻鈞轉橐籥緹室潛葭莩觀物昧休徵永歌
啟貞符

又

九月十五日作
德平伯長繼學

金神縮兌澤水妃表玄英西郊散冰粟北戶垂珠璚三
登發重瑞六莖凌孤清白藏縞衣舞顙氣霓裳呈楚客
迷望眼羌戎候軍聲桂粉靈杵飛穀精露囊盛降霜鄒
子憤停日陽侯爭澄霄鶴失頂空江鷺搖晴菊貞迈素
樸木落超空明鏗鏘商籟諧大小藍璞成蕎花賸壟畝

梅蘂光檐楹初疑蚊蚋集漸覺鵝鸛迎漢盤結夜濯韓
堂滅宵檠陽和趣報社嚴疑儼書正掩袂青女避沾
巾素靈驚擊鷹眩莽蒼樹羽登崢嶸長楊散旃屋五纛
增門閤絮團柳殘葉鹽裏荷留莖鉛飄孀娥匣旄落少
昊旌井梧炫銀牀庭櫻轉珠纓萬入西帝遊六變坤母
寧初驚遽然至忽訝乃爾輕單衣亟搗素黃裳倏飄瓊
陶姬却悵暖唐皇咽簫橫昊天有正命殺氣何橫行沈
沈宸居肅兩兩台階平朔吹偶先集澤雷久藏鳴碩果

理固在飛葭澹無營

槍竿嶺

伯生
伯長

有嶺名槍竿其上若棧閣白雲亂石齒青峯轉帶脚積
冰太古陰出礦無底壑馬飲沆瀣泉鷹盪扶搖幕轍跡
委垂紳人聲發虛橐鳥飛接鳥背羽沒疑虎躡霧松秋
髮長霜果春頰薄升樵不知疲獨徃端有愕兢兢矛頭
浙抗抗井口索凝睇見日觀引手探月廓南下眇塵海
北廣絡沙漠金橋羣仙迎玉幢百神鑿禽鳴蜀帝魂鐵

鑄石郎錯鈎鈐挂闌干櫓槍斂鋒鏑屬車建前旄馳道
徇嚴柝載筆三人行弭節半途却

送曾編修

伯長

奇鶴慕南雲俊鶻欣北雪行藏龜左顧去住坂九折纂書
墨兵從擬制銅史挈佩委松籟回冠峩星光徹埽花窺
日輪井藻旋風鐵歸思紅葉高家憂紫荊裂裳裝發五
兩夕祖謝駟馘沙明石痕瘦川遠桅影列吳歌導鷗舞
楚製慘鶉結汀葭青女臨岸橘黃人揭組練危瀑懸蕭

磬古灘咽詩箋江神幻目送山君別炯炯鴈集洲挺挺
鶴鳴垤賈駟魚貫直僧屐鷺飛滅前坡指迎帽舊墓拜
表碣明知紹世譜詎肯逐宦轍兒孤文襁昏女乳粉鈿
涅槃思振鵠原後肩起鳳穴過都塊非歷去魯浙豈接
歌驪念睽違瞻蟾數盈缺

李成古木

層陰舞玄蛟積溜落銀繭迸空太古枝

伯長

側石千歲蘚

寒柯紐交樛霜枿釋餘泣

繼學

俯憐巖壑幽仰矚雲霞淺

雄姿虎當岵鍛翮鶴立獻長身屈迴紋曲蓋表繆篆矯
矯却岱封昂昂陋桐翦初疑居移鄙漸覺坐閱鮮靈光
魯國歸屈軼虞廷彥蔽牛我當容化羊君莫辨山靈養
洮沐憲霧勤澡髯直非龍髯觸勢若鹿角偃蕭騷閱馳
颺懽悅集微霰玄黃馬師遺丹青擻尊醜采苓乃夷猶
卧雪何輾轉

清容居士集卷八

欽定四庫全書

清容居士集卷九

元 袁桷 撰

律詩

五言

次韻善之雜興七首

習隱漸成癖
苔光綠映扉
避名常好好
絕俗任非非
日落長鏡柄
天寒白苧衣
南鵬五月息
戢翼笑羣飛

萬事不滿笑
書林盡歲娛
未須夸得意
底用哭窮途
細

雨看移竹秋風學膾鱸百年真急景醉入壁間壺

昔日登臨地狂歌祇自求漢宮空有恨吳女不知愁雲
葉寒沙霽江花古岸秋何人持鐵板敲徹舊邊樓

學道常無寐披衣聽曉笳精勤慕栢大詭幻笑樂巴丹
熟抽金永窻明鍊玉沙微陽端有候一點應吹葭

善之
近學

參同契故
戲及之

卧遊元不惡佳處絕榮枯雲憶東西寺山看大小孤行
年須白社失意付黃壚何事遼東鶴空悲景物殊

鄧子清如竹蕭蕭澹世情下帷憐草色倚杖愛松聲嗜
癖成書賈身窮付筆耕乘槎空有約何日海邊城
書聲連古巷疑是白雲廬吟苦眠料理塵深靜破除詞
華輕大厯風雅近黃初顧我相知舊艱難愧不如

月黑

月黑斗杓轉昏昏古柳壕干擷寒戍響宰堵亂烏號風
定歸潮急門深落葉高向來江上意無語獨蕭騷

次韻題林隱

移家鄰縣去住久不知年花擁檐前樹泉歸澗下田丹
霞承露浴石乳拾松煎擬欲題新竹才疎愧惠連

次韻上官伯圭夜坐觀梅二首

愛酒嫌劇飲天寒但欲眠烏啼千樹外鴈過一燈前霜
角悲涼調風幡自在禪平生江海意袖手送殘年

江梅元楚楚冰雪總相宜肯佐金樽舞寧辭玉笛吹天
心元自正地脉本無私不盡關山意巡檐與賦詩

題柯自牧救荒記

曾聞於越地千里草青青比屋呼庚癸連年厄丙丁已
傳青社記不用峴山銘近說天台宅新成太祝廳

壽高舜元父二首

喜見黃鐘月重推絳縣年雪窻溫鼎火春甕養壺天朝
市成真隱階庭擁壽仙時吟五字律獨立晚風前
玩易喜心清年高見太平杖扶靈壽穩松削養和輕夜
月前朝事春風九老盟初筵慙後至立雪捧深觥

打灘

老石太古色遊魚新水姿輕冰養流永急瀑散飛碁角
力誰為挽臨流亦自移南來多此意北望莫相疑

春陰

寂寂春陰半南來未識花故鄉憶寒食細雨摘新茶物
色供詩句風沙入鬢華山林元未改客路獨烏紗

懷城南諸友二首

春至長為客愁多始憶君風程江北路水驛海東雲杜
宇深深怨醑醑淡淡醺行藏曾共數不是故離羣

養性深辭酒全交淺作書寧知故人厚自愧後生疎
春入黃河道雲分碧鳥居江湖從浩蕩不敢愛吾廬

舟中雜書五首

野色連雲白春聲引樹清遊魚新浪急歸鳥片帆輕
曉夢三千里風餐第幾程萍蓬元未穩徙倚問天明

挂席踈星外停舟獨柳邊團團風始陣怗怗月初弦
隴曲沙成雪吳歌水拍天行藏有如此把卷獨悠然

春睡元無著鄉心比酒醲飛花空有意小雨不成容
獨

樹疑新堠羣鴉似亂峰
艱難憐浩蕩散髮遂初慵
河落渾無底飄零總客塵
春洲蘆鴈少曉戶柘蠶勻
京洛饒豐稔江湖樂賤貧
低徊吾不恨應有故山筠
桑柘斜陽道天然錦繡機
雲容催溽暑花片憶春霏
水落新魚瘦風清宿麥肥
歸程時屈指重午試生衣

淮浦

淮水奔如箭舟維岸屢移
斷岡封馬鬣落鴈陣魚麗
白葦前朝界青帘古戍基
亂離今已矣風物漸熙熙

立春日宿大清口舟中見新月二鼓雪作

春月如佳士翩翩欲上船相逢疑昨日一別又新年水
鏡心胷朗空輪體質全更深飛雪急直與鬪清妍

次韻陳剛中待制初秋二首

碧樹晚雲餘秋聲入客廬知公吟蟋蟀勸我憶鱸魚
宦味原無著鄉心得未踈清塵滿雙鬢蕭瑟不禁梳

岸幘倚書楹寒砧徹四城馬歸人獨語鴈過月初生
寂寂候蟲急淒淒落葉清客懷誰與共搔首見參橫

送牟元通歸瀘州

西州人物論翁季，擅清門已暗金牛路。猶傳鐵騎孫巴，
江雲不盡蜀嶺雪。空存邂逅衣冠聚，艱難得共論。

夜夢作詩覺因足後韻

薄酒薄於水，濃山濃似春。梁間雙語燕，天外獨歸人。細
柳千重緒，飛花一寸塵。碧窗初睡醒，新月寫清真。

淮風大雨

極目虛無裏，飄飄萬里馳。飛蓬旋索籥，虛谷應埙篪。春

樹原無著晴雲復自持倚舟沙際穩歸鴈莫相隨

題溫州太守德政詩後

海郡炎歊重涼風起素秋飛蝗分界去鳴鵠下陂遊
白布官租減黃甘雅詠酬兒童多好語竹馬擁君留

次韻馬伯庸春思兼簡繼學二首

洛花千萬朶一一為君開粟暈排金縷酥凝爛玉杯
美人乘馬至僊子抱琴來莫學飛紅侶隨風喚不迴

行窩春匝匝下榻望君來雙玉矜嬌思聯鑣騁逸才
題

詩紅袖擁傳詔錦袍迴羞殺高眠者楊花滿綠苔

送秦巖卿從事出宰北平縣

高秋右北平出宰樂時清白水前朝界黃雲舊塞城彈
琴看鴈過束帶候鷄明不盡平蕪際題詩倚馬成

黃河口

徐州城西北偶與黃樓相衝今從此南流

河落流沙駛茫茫禹甸周昔聞傳北載今已絕東流俊
鵬辭高下輕鷗擅去留百年文采盡日落認黃樓

徐中丞母八十

謝庭森玉樹漢闢賜金花懿德傳家盛耆年舉世誇晴
萱當檻直冬筍隔籬斜拭目諸孫秀翩翩佩紫綬

送張榮澤

斂板滎陽縣栽花接早春水新魚子散雪釋馬蹄勻政
可箋河伯何須詠洛神桑田今幾許除籍補疲民

贈瑛上人住洞林

托鉢千巖裏松花凍未開哀猿依講席飢鳥下生臺潭
影留雲定鐘聲送月回山中太古雪為寄一瓢來

送周南翁集賢南歸省墓

搖曳十洲僊來尋楚尾船金花榮故里石筍表新阡江
橘團霜重冰魚繪雪鮮堦前雙玉好行賦鹿鳴篇

潞公判永興遊嵩之詩見於翰墨然卒與右軍
之游汝大率相類名為造物所忌豈虛語哉今見其
孫璋甫佐西省甘棠遺思至是殆將見之

渭水落葉盡往來餘碧鷗龍門七十里鴈塔一千秋弔
古麒麟塚衝風驪驪裘寒蕪明滅處遮馬見君留

劉氏集慶堂

華構出層林春浮院宇深小桃分雜佩新燕掠鳴琴石
乳千年潤松花百尺陰紫皇方問道那許遂初心

送蘇子寧和林郎中二首

貂帽護寒沙冰天閱歲華斷溪馳聽水密雪犬行車雲
盡難尋鴈春深未識花昔人奇絕處八月解乘槎

往歲經遊地寒蕪碧燐深雲開山後陣水咽隴頭吟雪
白羶房重天青羽檄沉重華新雨露悲喜候車音

蘇子寧地行詩二首

出塞黃雲盡經春白雪多樓高聞鼓角絕域靜干戈風
急盤鵬嶺冰深飲馬河征鞍遲明發揮手渭城歌

去去居庸道關山冬氣深雪天孤帳宿寒月一笳吟石
堞棲鴉穩沙場過鴈沉粉闌多暇日歸騎有佳音

吳閒閒病起二首

好客頻來往閒雲管送迎花香清病骨松籟答書聲身
世三生夢乾坤萬古情故園多蕨筍歸興繞江城

客散庭如水春深日似年間心觀宇宙浮世閱風煙詩
句吟難穩蒲團坐欲穿一聲松外鶴此意共悠然

題蔚州郭氏永寧亭

華亭絕市囂山嶠映岩堯落葉燃茶鼎長松挂酒瓢天
低雲欲下春盡雪初消歲晚無王事前村看射鵰

次韻馬伯庸題凌波僊圖

玉衣朝岱日寶瑟寫湘雲宛轉鸞歸憶參差鴈過聞石
痕生左角松影印迴紋倚竹憐雙泣摘蘭憫自焚停驂

沙磧近指點認昭君

卷九

伯庸以詩見屬次韻二首

學古陳言少官清雅詠多珠玕明玉海寶鑑挹金波易
賴韋編定書疑汗簡訛斯文今有託為我補嘉禾

聽君人物論閱世似難多學禮師倉海傳家繼伏波看
山窮北戒惜日愛南訛彩鳳非無食瓊山自有禾

高掾祖父八十

心跡混漁樵門深絕市囂花前歌舊曲燈下話先朝白

髮書千卷朱顏酒一瓢有孫遊玉署從此樂逍遙

長春道士禱雨有應

清夜轉崑崙天雷卓午聞平林千樹響古澗百泉分門
靜堆黃葉山空聳白雲神功滿禾黍尸坐答鑪熏

次韻馬御史題漢州喻氏多勝亭

花壓金橋重春風第一州江宣朝灌口雲擁護遨頭鴈
落沙中渚鵲啼竹外州使君燈火地為我倚高樓
鶴山
年少

時守漢州元夕
張燈金鴈橋斷

次韻伯庸過天寶宮

松暝碧雲深，鶴歸人倦尋。
朝回香滿室，詞罷月盈襟。
白鳥分山影，黃鸝轉樹陰。
小溪流不歇，咽咽似鳴琴。

送白誠之赴台州別駕

峒堯巾子客，市近海潮通。
桂樹團雲濕，松花帶露濃。
猿隨僧屐雨，鷗送賈帆風。
盡道無王事，持杯百過空。

贈瞿者

尸坐包玄象，虛窓萬籟沉。
聽泉知地脉，候琯合天心。
風

定馬蹄急霜清葉落深弄九端可學從此罷鳴琴

送成公履守光州

淮樹連空碧淮山徹底清濯纓羞戀闕佩印樂專城
曬網雲催泊提壺雨勸耕地偏王事簡數鴈寫琴聲

寄開元奎律師五首

開元古壇主盡日著袈裟社主勤供菜天神罷送花
蒲團黃葉護香鼎白雲遮終歲無王事繙經到日斜

開元古壇主老至律精嚴洗鉢魚遊水開門鶴入簾
拾

薪供茗具滴露寫經籤已悟如來意看花不用拈

開元古壇主身世兩相忘客至常扃戶僧來不下牀神
光千里鵲玄辨九秋霜白業渾消盡蓮池任意香

開元古壇主瓦石化丹青似住元非住無營類有營念
珠金的礫戒鉢鐵晶熒我亦慙塵垢清齋養性靈

開元古壇主幼歲已相聞我竟飄京國師方玩水雲一
官千日計萬事五更分共約脩蓮社空林洗垢盆

髫齡侍諸父拜雙峰祠堂未嘗敢有題詠二十

年來接武于玉堂瀛州霜露之思缺然有覲近
聞平石長老興廢補仆光紹前聞遂述舊懷為
六詩且申歎仰

沈沈大士閣千嶂萬夫降近樹青禽獨前松白鶴雙雲
霞生几席星斗列軒窻俛首京塵客生涯愧老龐

慚愧雙峰老光明兩足尊

新妝釋迦佛像

午窻鈎竹影凍筆點

梅魂齋近烏啼樹禪迴虎伏門春來有新鴈勸我趣歸

轅

經院辛勤日千金記始興

創寺時以賜金千兩
經始今八十有四年

雨荒蟲

蝕拱壁壞鼠緣藤舊觀丹青復諸天錦繡承短簷增突

兀會見出盧能

書來修選僧堂舊有術士言太高狎沙
門咸其枉然青班亦不聞有顯者故未

之及

陰陰虞監宅

虞永興宅

鬱鬱越公祠掬水不入獻布金猶受

疑流年翁仲守往事必芻知間水交流處曾傳玉帶垂

寒徹清泉底山童上水華定金非在井

羅侯羅尊者語
傳昔有一女子

壁釵其
水遂定

煮米却成沙洗目能生電搜腸可當茶人持一

月去此月落誰家

跣趺千樹暝彈指百花春道以東巖的詩於北澗新歸
雲呈住相行籜掃空塵靈鷲誰公論啼猿正惱人

次韻張希孟凝雲石十詠

我愛凝雲好神交萬化前碧窻圍蜃氣黑浪袞蛟涎化
石知何代出山今幾年相從清思長寸穎起蒼煙
我愛凝雲好飛塵萬馬驅雄深麾將士峭直傲公孤斷
足鼇分極摩牙虎負嶠何年化霖雨慎勿竟虛無

我愛凝雲好雍容諫諍姿虛中超混沌正色走窮竒潤
物非無意成功自有時棲遲元未晚清坐愧神癡

我愛凝雲好氤氲萬象深鎮浮廊廟體閑靜雪霜心屈
曲蜂房綴玲瓏蟻穴淫玉京誇獨秀此日汗腰金

我愛凝雲好朝昏境不同金芽養靈谷鐵網起晴空月
色古今正潮痕子午中點頭那有異吾欲問生公

我愛凝雲好神清湛欲留岷峨千古雪秦華一天秋獨
鶴離羣皎層冰出澗幽無言有深抱山立正陽休

我愛凝雲好糝糊老墨仙癡墓端食月渴驥欲奔泉守
黑壺中日談玄洞裏天煙霞元自足塵世未為賢

我愛凝雲好翛然一榻棲支機何物誕醒酒此君低香
遠能為霧泉深解作溪未須鄰綺角端可比夷齊

我愛凝雲好能歸萬古春遺簪三島客椎髻八蠻臣相
子添清供梅花寫舊真天心元不動東海任揚塵

我愛凝雲好蒼龍擘峽飛振纓悲濁垢整珮謁清微歲
月江翻浪冰霜玉韞暉黃塵今幾許且勿展書幃

山水圖

樹重雲光濕峰寒曉氣清
抱琴人欲往門暗客相迎
凍雨生寒溜深雲倚怪藤
蹇驢吟不得指點墨千層

淇綠堂

卜築荆溪下碧陰生晝涼
軒昂丈人行瀟灑此君鄉
月候緱山鶴雲催嶰谷凰
衛風朝夕誦底用別詞章

寄砥長老

雙峰不受暑傑閣稱幽禪
蕉葉綠雲扇藤花白雪氈
見

龍增澗水喜鴈點江天笑我開平客于今第幾年

送李希白降香武當山

絕壁通靈籙天香簇寶花重明應龍馬習坎伏龜蛇度
嶺金盤日穿雲玉珮霞道逢採苓叟應與論南華

送永新王東野還里

天際風花黑燈前鬢影蒼方刊肘後秘金散橐中裝某
樹童年種茲丘晚歲藏已忘朝野事飛鷺起鳴榔

輞川圖

詩中傳畫意畫裏見詩餘山色無還有雲光卷復舒前
溪漁父宿舊宅梵王居千古風流在披圖儼起予

贈雪窻上人

少日觀滄海陰山恨未登飢餐太古雪渴飲萬年冰柳
色迷官道鐘聲動客燈聞聞與見見問我一枝藤

直沽口

二水赴滄海客行殊未休漁舟維病鶴歸棹起輕鷗雨
重雲光濕天低樹色浮京塵今已洗從此問菟裘

三月廿九日阻風馮家口

飄泊春風怒維舟古渡濱防堤堆馬鬣颺浪捲龍鱗
掠吞吳陣紛披障庾塵柳陰亭午轉人靜白鷗馴

次韻劉明叟

欲知行路苦孤鴈促歸期矮屋燈昏際空林葉落時
滄浪誰歎乃襜褕笑吟癡點檢韋囊裏珠璣總屬詩

壽閻承旨三十韻

寶厯書堯甲蒼杓指夏辰修齡天保魯嘉瑞嶽生申人

物中州正陶鈞淑氣淳舒晴翹孔翠墮地擢麒麟藻思
傳髻綺蜚聲起措紳文鋪崑玉鏤賦約楚蘭紉樂道車
中聘談經席上珍飛牋油幕佐執簡栢臺賓黼黻開丹
地絲綸演紫宸慶雲圖遠牒甘澤洗荒塵評論空餘子
儀刑倚重臣昂昂霄漢表皎皎雪霜身滄海鷗忘慮長
風驥絕倫名高諸彥避德盛後生親朗鑒中秋月天和
太古春精忠言欸欸獎引語諄諄書葉題文債詩筒破
酒巡筆翻金井凍詞吐露桃新格律常楊陋篇章鮑謝

鄰辛勤憐我輩銓賞屬斯人南極呈黃道東皇挾絳輪
霓旌紛旖旎香鼎秀氤氲果熟分金母丹成養谷神心
澄眸轉碧光瑩頰浮銀物色歸青簡年華閱大椿小車
花外影馴鶴竹間真賀履聯行整傳觴捧勸頻踈間看
遠岫虛靜傲蒼筠往事雲舒卷流年肘屈伸長生端可
學靈壽不須陳

次韻仲章過陳氏城南書隱十韻

矮屋參差倚平蕪黯淡看夢迴榆塞遠愁絕翠峰寒白

髮游絲星丹心古鏡圓
槐明金瑣碎菊鑄玉巔
玩憶月時看劍臨風復
整冠鄉音憐過雁古調
拂離鸞去矣歌招隱終
焉樂考槃晚知交態薄
老識宦途難口腹非真
累毋煩饋一簞

入南城遇老醫言山陽舊事因成十六韻

邂逅山陽老相傳事已訛
姦雄歸草莽天地入悲歌
太守籌謀誤將軍禮數苛
鞬橐同下吏騶御失前珂
渙忍顏如此憑陵事若何
比肩身肯辱却立齒爭摩
水掩寒

雲甲風揮白日戈耳聞人作膾眼見血成河翕霍同么

子倉皇類小喘官軍奔及馬婦女走乘騾自古儒冠忤

難將杯酒和功成真草草

先公在宥府論山陽事去國後維揚論功咸謂偶幸

時

至復我我漂母恩徒快中郎詠未磨

荀羨為中郎將有北征詩

遺屯

迷鼈石

鄧艾所築

舊浴暗龍渦土沃村村麥湖深處處荷人

生貴行樂何必問銅駝

壽致政王侍郎八十二韻

壽俊標周士儀型望魯儒輞川饒詠賦璜水秘謀謨壯

歲丰神整明時臘仕殊東曹誇鵲擊公府羨鳬趨審象
三韓使含章四皓圖長身昂野鶴正色叱妖狐誓墓文
何早傳家計豈迂鄉稱三老舊人說二難俱舍並分桃
塢田開別芋區水邊時避飲月下屢嗔扶眼碧看山媚
鬚銀映雪癯油車懸蹠躐野服綴檐榆社肉時相餽春
醪不用沽綵衣新稚子椎髻古奚奴鼓擊深深舞茶烹
緩緩呼花飛迷去路鳥下避行厨南極珠分瑞東泉斗
借料造朝看賜杖八里記垂弧翠栢根如石靈龜息自

腴從今躋壽域底用詫康衢

壽年獻之大理卿七十三韻

氣槩岷山秀風神閬苑僊西山餘故老南國挺真賢瑞
靄垂弧日人思衣繡年清門開耄慶綠籍紀齡延止息

功參易虛心體合玄龐眉垂素手漆髮換華顛

今歲七十眉間

忽生兩毫髮重黑

鳩杖何期賜牛車不待懸三鱣傳素緒一鶴

記青氈粉社爭為壽蘭堦數擊鮮風驂追廣莫雲珮憶
釣天往事清霜木希音太古絃五更尊禮絕六老舊堂

專

所居正六
老堂遺址

杞菊調饕鼎丹砂養井泉慵書乞米帖羞

辦買山錢醉劇簪花舞遊疲枕石眠黃公終慕隱白傳

且逃禪文物傳青史耆英入繪編弁山寒戢戢苔水響

娟娟望海傾朝夕瞻星候次躔登龍身未武執雉意空

傳偈仄徒多恨低徊祇自纏窮鄉真坐井陋室強懷鉛

夜月思延桂秋風學詠荃終然羞弱植復爾滯孤騫問

字瓶空在傳經席未前牛衣期振拔馬磨費評詮冰柱

垂青嶂蠙珠湛碧淵至言機已息妙技目無全凡質丹

須換精誠溜合穿
朔風輸善頌立雪異敷宣

壽李承旨四十韻

寶厯開三禩
瓊章集萬神
蒼龍迴插子
玉兔候交辰
潞水丹騰渚
壺闕氣接旻
道傳莘野正
學比傳巖醇
帝運昌文統
師臣秉國鈞
清宮高贊畫
潛邸舊經綸
意得超今古
才雄異等倫
春浮霞錯落
秋映玉嶙峋
三執中書柄
重開大國畷
黃鐘陽脉脉
瑤圃霧氤氲
僊鼎神膏秘
宮壺掌露真
恩醲錫麟脯
味薄謝猩脣
瞳碧光流漆
顏

紅色耀銀垂紳凝泰嶽設席陋平津手挈重華古心追
貞觀新至人專上壽八表樂同仁非虎者年並猶龍祖
譜親息深忘蝶化機靜狎鷗馴蕩蕩心無競肫肫俗易
淳極知調鼎餽不惜汙車茵竹帛千年事桑麻萬里春
管商謀可鄙房杜跡常遵斟酌扶元氣彌縫護國珍倚
風憐竹弱聽雪喜松皴玉署親裁詔青蒲獨奉宸蜀江
移戍罷浙土減租勻榻淨惟烏几堂虛且角巾手揮廷
下史目送幕中賓習隱時思許題詩尚憶秦秦田溪溜

溜花塢澗粼粼問俗停車緩貪賢倒屣頻藥囊儲赤箭
水鑑徹青蘋滄海收毫末空林絕隱淪籍功文館定約
法論堂詢出處闕吾道安危佩一身政須陳蹇蹇直與
紀麟麟續藝慙班馬抽才頌甫申占天徒有管望野眇
無垠閱歲桃成實知年海拂塵扶蘇慙小草蔥蒨託靈
椿

送文子方著作受交趾使于武昌長律二十韻

萬里蠻陬貢清秋督使馳乘車專述命受幣聽陳辭紫

舌音聲狡雕題聚族滋玉門心愈遜銅柱約難移江漢
尊南服星辰拱太儀趨庭輸齒草授館列膏脂私覲情
鈎隱公言理折疵彈丸空有險東矢定無疑柱蠹消煩
溽著龜審事宜要荒工跌宕保障慎羈縻鸚鵡寒汀遠
蒹葭晚岸歌壯遊詩句豁古戍角聲悲月矗珠簾正山
低翠浪欺班超空耿耿陸賈政怡怡楚水愁腸結衡峯
望眼眇過門王事急去魯驛程遲緬想垂衣治深求補
袞資大夫謀可利小客禮須持諭蜀徒煩檄平南漫擬

碑佇看王會傳端假史臣為

魯子翬御史分按遼陽作長律五十韻愛其精

密予今歲亦扈蹕開平因次其韻

象御天街正烏輪海觀昇省方秋戒慎扈蹕歲因仍石
迸根駢拇山迴勢左肱塵深疑帽重霧密覺衣蒸午頓
炊難熟宵征酒易勝解鞍心惘惘執轡念兢兢酪水分
罌缶通薪筭斗升皮毛均製服脂腴或燃燈統幕迷高
下烽臺閱廢興度關泉水咽出口月華澄狼戾官芻峙

魚麗餌粟徵千房雲疊疊萬竈墨層層列帳排衣甲行
營護棘矜旆旋環似翼鼓發去如繩斗北瞻紅棧雲西
指白登草肥青穠稷松聳翠峻嶒積雪疑忘象搏風訝
徙鵬屬車攢幄帳行殿儼茵憑白氎時逢賈朱衣定指
僧翠旒逼華蓋金甕耀觚稜觀闢天經界儀臺象緯凭
飲飛拳似虎鐵杖足如能竹帛司常煥丹青職貢增會
朝珠帽簇錫宴寶卮凝陛立齊垂索師行陋釋棚廣寒
通月窟高輿寄涼槽上聖英資異丁年武德弘天戈中

夜渡星檝百川承同軌嚴行夏明裡耻用鄧別州端首
冀分器定先滕德啓無疆服光傳有道曾皇威宣絕漠
陽澤散堅冰表正辰居所漸仁水集墉庭開下鳴鳳苑
廢罷飛鷹舉逸尊加璧掄才鄙販繒鄧林搜八柱瀛海
取三凌曲學慙繩祖孤聞賴得朋沉思雲外弋冥索澤
中留客議雞同鶴人疑驥聚蠅濡毫終有思執簡豈無
懲謂可兼遐邇胡云立愛憎清芬蘭佩結芳薦蕙葢蒸
鴻筆吾誠忝輶軒子累乘共知心耿耿相對髮鬢鬢馬

磨誰憐許龍門共企膺枚生詞過實揚子德徒稱盛化
乾坤闢王綱日月恒麟符昭炳蔚豹霧駭超騰虛白難
為繪空青不受矰欲追千古筆為付一枝藤

王趙公八十應制十韻

耆德膺熙洽皇風協泰和公明旁作穆帝念叙惟歌粉
社新封土蓬壺舊隱窩黃公資輔翼白傅退婆娑望日
靈龜息擎雲古栢柯精神霞炯炯儀觀玉嵯嵯設醴樽
浮蟻蕪珍釜錫駝擁牀爭置笏立馬會鳴珂服食丹藏

井絲綸錦簇窠永須依日月何必問煙蘿

壽開府承旨十韻

泰嶽舒紅日天門爛紫霞氤氲生宰輔磅礴贊亨嘉
文武揚中外寬嚴接邇遐遊嵩雲擁馭度磧雪飛沙
畫戟車流水青編筆有花精神春不老器宇海無涯
玉殿彌綸重金鑾密勿華傳宣花似斗錫宴棗如瓜
上壽三千歲元勲第一家山河開賜履早晚聽宣麻

劉邢公九十應制十二韻

賜履光華閥延齡冠帝畿氤氲秋霽嶽菌蠢露凝芝六
聖存遺老千官介壽祺傳宣鳩飾杖錫宴蟻浮卮餐玉
銀鎔頰簪花翠壓眉灌陰機怙怙擊壤樂熙熙坐石雲
生窟澆槐水溜池霜深風脫木冬暖雪消梨往事先朝
夢多情舊日詞魯公方拜後驚子定為師用拙長年櫟
虛心太古著成功全靖退樂道過期頤

次韻伯庸畫松十韻

妙思通靈素玄陰接帝青抗顏躬蹇蹇蒙頂髮星星颯

爽龍羞豢蕭疎鶴鍊形壁虛生地籟斗近界天經蝶夢
春濤湧蟲疑曉日冥雲生停竿候風入倚窻聽屈曲車
連軫騰拏簾列庭戀鄉思海岱封爵鄙雲亭月落孫生
嘯天寒屈子醒雄姿輕虎豹浮跡陋鷗鵲

壽張希孟父郡侯八十二韻


古渭垂綸老康衢擊壤翁星輝勝處士天爵貴家公
顯氣西郊肅祥雲北渚濃坐班鳩杖叟舞轉柘枝童
壽骨英先聳龐眉厚德充九重恩誕錫三命偃彌躬
麟紱開

華旦龜齡擬少蒿簪花便廣穎植菊瑩方瞳鼎釜兼珍
飫刀圭上藥融傳宣壺燦爛合宴佩青葱積慶先猷遠
詒謀晚福豐靈椿培世範玉樹挺家風正色通天闕高
懷納楚宮倚風看鴈北就日見雲東君父恩彌重交遊
論盡同竭誠心翼翼移孝思忉忉意壯追奔馬機忘數
過鴻玄參揚子衍書比伏生工浩蕩漸摩澤昇平垞北
功定須超渾沌何必問崆峒

王叔能侍丞相入見王繼學尚書序其事謹賦

十二韻

行殿圍氈邸鑾輿擁翠簾重華方聖治上宰益勞謙臺閣推公幹蒿萊擢孝廉官儀精考核選格絕停淹議禮心如較探賢手自籤都曹清望重瑣闥雅才兼對榻褒嘉寵垂紳俯伏瞻傳宣桐酒錫拜命襲衣沾令節熏風細皇恩湛露厭事殊靈壽杖賜比水晶鹽際遇喧朝野矜誇徹里閭遺臣思載筆往恨泣攀髯



清容居士集卷九